

張文襄公奏議

張文襄公全集卷二十九

奏議二十九

到湖廣任謝恩摺

光緒十五年十一月二十七日

竊臣前將交卸兩廣督篆及兼署廣東撫篆暨起程赴鄂日期先後奏報在案茲於光緒十五年十一月二十五日行抵湖北省城二十六日准前任督臣裕祿將湖廣總督關防王命旗牌文案卷宗派委武昌府知府李有棻督標中軍副將蔣澤斌齎送前來當卽恭設香案望闕叩頭謝恩祇領任事伏念臣一介庸儒迂疏寡效渥承異命迭領連圻昔視學以采風循行江漢今綏疆

而問俗遠及衡湘顧茲中原綰轂之區適當潦水告災
之後臣惟有敷宣德意期蘇澤野之嗷鴻整飭戎行務
靖江湖之伏莽所有地方應辦事宜隨時與湖北湖南
撫臣和衷商榷認真籌辦以冀仰答高厚鴻慈於萬一
硃批知道了欽此

遣散親兵並奏留吳良儒片

光緒十五年十二月初九日

再臣由粵起程行次江蘇上海地方恭閱邸鈔光緒十
五年十一月初七日奉上諭張之洞奏隨帶親兵前赴
湖北等語各省標均有額定兵弁足敷差委本不必另
立親兵名目近來總督赴任輒復添帶親兵既多糜費

且與定制不符所請添募親兵五十名著不准行其原有之二百名卽著管帶官吳良儒帶回廣東不准隨赴湖北等因欽此查臣隨帶赴鄂親兵二百名本係淮軍恭讀諭旨遵卽飭管帶官補用遊擊廣東儘先都司吳良儒傳諭該親兵等卽行起程仍乘原輪帶回廣東該親兵等僉稱離鄉已久旣經渡海均不願再回粵省當卽在上海地方由臣酌量賞給川資妥爲遣散至管帶官都司吳良儒本係臣由山西奏調赴粵之員歷在軍營出力紀律嚴明任事勇往甚爲得力現在親兵旣已遣散該都司已離粵省在粵並無經手未完事件據稱

在粵數年水土不服早年從軍剿匪屢到鄂省於湖北風土情形尙爲熟悉情願改歸湖廣督標效力等語查部定章程副參以下各官保有省分者遵旨留於該省候補奏明改發者仍行照准等語歷經前任督臣將他省武職奏准改發湖北督標有案可否仰懇天恩准將補用遊擊儘先都司吳良儒改留湖北歸標按班序補之處相應請旨遵行

硃批著照所請該部知道欽此

借撥粵省槍礮片

光緒十五年十二月初十日

再臣前在兩廣任內歷年購置外洋各種後膛精槍行

營車礮爲數不少存儲尙多茲奉命調任湖廣湖北地處上遊會匪伏莽竊發時虞亟應籌備軍實以應緩急近來南北洋暨沿海各省演習槍隊礮隊均屬優嫻湖北爲通商要岸地方衝劇營伍爲外人所屬目而各營猶復沿用舊式前膛槍礮於後膛槍隊礮隊操演之法多未通曉亦無以副朝廷整軍經武之意臣前經奏明借撥黎意槍一千枝自粵起程時復與軍械局司道商酌再撥黎意槍一千枝共二千枝槍彈二百萬粒七生半克虜伯行營車礮十八尊礮彈九千枚隨帶赴鄂發交鄂省軍火局妥慎存儲隨時酌量撥給各營應用其

價值若干應俟廣東核明後由湖北籌撥歸還

硃批該衙門知道欽此

粵省訂購織布機器移鄂籌辦摺

光緒十六年閏二月初四日

竊准戶部咨開廣東司案呈准軍機處交出兩廣總督李瀚章奏擬設織布局廣東礙難辦理情形一摺光緒十五年十二月二十六日奉硃批戶部知道欽此欽遵交出到部查原奏內稱前付訂購機器銀二十二萬九千餘兩係由閩姓商捐及軍需等項下支墊其未付之十七萬四千三百餘兩明夏設法籌付等語相應行文該督撫即將閩姓捐款一項已繳未繳及所分年限分

晰報部至明夏應付之十七萬四千三百餘兩動支何
項一併聲覆等因並准總理各國事務衙門咨議覆詹
事志銳奏請整頓商務一摺原奏內稱棉布爲用甚廣
大利悉歸洋人亟宜自謀織造以塞漏卮查上海已設
織布機器局本年兩廣總督張之洞亦經奏明於廣東
設局織布因時興利實爲不可緩之舉惟事甫創辦必
須實力講求認真經理如果經費不敷或撥官款或招
商股隨時分別奏咨辦理等因奉旨依議欽此欽遵咨
行到臣竊以購辦機器設局織布開中國自有之利源
杜外洋歷年之鉅耗因時制宜事不可緩久在聖鑒之

中惟成本甚重商股既不易集庫款支絀官本亦屬難籌然若坐視其難而不爲凡事何從創始廣東地大物博較之他省尙可有爲臣上年在兩廣總督任內督同司道籌議均以購設布機係屬振興商務惟有設法勸令閩姓商人籌捐時值舉行鄉會試恩科閩姓收數較贏商力尙能辦到當飭善後局員多方開導勸令認捐洋銀四十萬兩爲訂購布機一千張及照配軋花紡紗各機器之本又以造廠及常年經費無出復經設法鼓舞令於光緒十六年冬間接充新商時另捐洋銀八十萬元合銀五十六萬兩爲將來建廠及常年經費之用

此兩款經該局員殫竭心力口舌督勸兼施甫克議定
均已詳定批准有案此係特籌專款非闖姓商人原捐
之數所有與光緒十一年奏明該商六年勻繳四百四
十萬元之正餉絕不相涉前因訂購布機時此款尙未
繳到原奏聲明先行籌墊旋據該商陸續呈繳業將墊
付半價銀二十二萬九千餘兩歸還其未付之價銀十
七萬四千三百餘兩本年夏間機器運到仍應由該商
所捐布機成本一款內撥付總計創議購機造廠以至
豫籌常年經費並未動用粵省司局各庫款及闖姓原
案奏明認捐之正餉此臣在粵設法另籌專款購辦布

機之實在情形也查購機織布原奏本已聲明如營運有效再推廣於沿江各省鄂省沿江產棉之區甚多自較廣東開設爲宜第非倉卒所能興辦今李瀚章既經奏請移機鄂省事關爲民興利臣自當力任其難惟創建此廠地廣工精加以常年經費爲數甚鉅鄂中物力艱窘與粵省情形相去霄壤此款一時實無從另籌查聞姓商人認捐另款之八十萬元本爲布機而設與正餉無涉原案具在迭經電商李瀚章撥歸鄂省現准李瀚章覆電以粵省用宏費絀未肯全撥允於此項撥洋銀十六萬兩爲鄂省布機建廠之用粵省用度誠多此

厥既已移鄂自不欲全數撥作他省之用在李瀚章已屬誼重睦鄰不分畛域臣亦未便固執前案過於相強惟運腳保險之費本應卽在購機價本之內合計爲數約計四五萬兩擬由粵省於另籌八十萬元一款項下支清此外卽不復索之於粵至布局常年經費臣前在粵因海防緊急借有山西善後局生息銀二十萬兩此款原係晉省發交當商生息作籌抵捐攤之用者於光緒十年十二月曾經由電奏明奉旨允准在案旋經山西撫臣滙寄到粵應用按年由外籌足息銀寄晉從無遲誤年來粵省業將此款籌出尙未歸還晉省李瀚章

來電囑將此項晉省生息款撥歸湖北作織布廠常年經費之用臣竊思此款在粵在鄂同是納息事同一律鄂可借充成本粵可免出息銀亦屬兩益當已應允撥借擬仍照粵省認息九釐按年匯還晉省以之充布局常年購棉及工用一切經費雖不敷尙巨亦可藉資周轉此項息銀自當由外設法籌措此乃晉省辦公要需臣服官晉省有年誼斷不肯膜視此又籌措建造布機廠屋及常年經費不動鄂省庫款之現在辦法也鄂省對江之漢口鎮貿易素盛特闔閭輻輳並無隙地可以設局現在省城文昌門外勘得官地一區高廣堅實近

在江邊便於轉運地基縱橫各百餘丈間有民房從寬
給價購買另片奏催江蘇補用知縣薛培榕由粵來鄂
監修工程俟該員到鄂卽日興工現今上海專設有軋
花紡紗局遠近爭購多運至東洋銷售爲用甚廣獲利
甚豐是其明驗向來四川湖南河南陝西皆銷湖北棉
布湘江沿漢歲運甚多實爲鄂民生計之一大宗近年
洋花洋紗洋布南北盛行鄂省花布銷路頓稀生計大
減故此局之設於鄂省尤爲切務一俟布局落成開辦
臣當督飭員工實力講求務令機器作法華工人人通
曉價本利息華商人人共見臣並當勸諭商民集資購

引之集卷之二十一
機廣設布局保我利源似爲今日銷土貨塞漏卮之要
策至將來成效大著時應否動撥官款擴充推廣之處
再當體察情形遵照總理衙門原議隨時分別奏咨辦
理

硃批該衙門知道欽此

武漢襄樊安設電綫片

光緒十六年閏二月初四日

再准總理各國事務衙門咨甘肅興辦電綫由保定至
嘉峪關官商分辦業經奏准開辦等因仰見聖明思患
預防無遠弗届之至意伏查湖北襄陽樊城地方北省
通衢楚邊重鎮界連陝豫刁痞會匪伏莽滋多時有竊

發之案而距省陸程七百里水程幾及千里郵遞需時
遇有緊要事機呼應殊難靈捷現在中國電綫四通八
達襄樊爲中原綰轂之區獨無電綫何以備緩急而資
控制且頻年漢水盛漲沿河各屬隄工潰決居民被灾
甚重若設有電綫信息靈通隨時捍患救灾裨益尤非
淺鮮查湖北向無官綫前經北洋大臣李鴻章奏請改
設鄂綫由川入滇湖北籌借銀五萬兩交商局領用事
竣分年繳還歸款等因在案臣體察情形只可仍設商
綫由襄樊通至武漢官報商情均臻便利當飭總理電
報事宜山東登萊青道盛宣懷籌議興辦茲據該道電

稟知府周冕已由嘉峪關勘回西安今飭由西安勘路
至荊州沙市入鄂一面派員購木運料俟勘至鄂省卽
由鄂興工並據稟稱商綫較之自造官綫可省常年用
費惟商綫造易養難懇酌撥存款二萬兩免利以示體
恤等語查鄂省甚爲艱窘不能如數籌付現飭司局籌
銀一萬兩撥交商局作爲借款不取利息俾資周轉仍
飭令酌度情形立定年限俟限滿卽將存款照案分年
繳還歸款

硃批該衙門知道欽此

請旨飭查摺

光緒十六年閏二月二十六日

竊臣恭閱邸鈔署廣東撫臣游智開甄別屬員廣東候補知府王秉恩署南海縣知縣王存善候補通判魏恒等均以貪劣奏參革職奉旨允准在案又據自粵來人紛紛傳述升任左江道廣州府知府孫楫亦被單銜糾參係游智開事後自告眾人者又欲參署番禺縣知縣楊文駿屢次宣言於眾經督臣李瀚章及兩司力爭中止仍將楊文駿撤任皆上年十一十二兩月內事也查王秉恩係現署廣州府通判魏恒前署虎門同知游智開署理撫篆甫經月餘而粵省一首府兩廳兩首縣悉被單銜參撤實爲從來各省未有之事該署撫臣原參

謂接見僚屬徵諸案牘采諸輿論確有可信乃臣在粵時游智開任藩司已經半年察吏是其專責如屬員中知有貪劣實蹟卽應據實詳參乃於以上參撤各員與臣公會燕見從無一言道及各員之短與臣公牘書函從無一字論及各員之非且各缺大率皆係游智開詳委者豈半年之內於案牘全無所考於公論全無所聞獨至署理撫篆一月之內忽然詳察無遺似不甚近情理如謂各員皆臣信任之人藩司任內暫行面從緘默姑聽其誤公殃民游智開素以強直自居當不出此原奏旣非據司道詳稟又未會督臣銜聞發摺已久督臣

司道俱未聞知直至今年正月半始抄奏稿咨行無不駭異夫以同城督臣及司道皆不與聞不識采之僚屬公論者何人且兩廣鹽務係督臣專管參革中有鹽經歷陳寶昉一員既不會銜並未先知會亦於例章不合查參革各員如王存善以辦理洋務魏恒以創辦海口省河補抽釐金經臣量才委用卓著成效近日通曉洋務人員甚少王存善委辦督臣衙門洋務文案幾乎日接見以勞見叙何用鑽營至王秉恩一員尤屬爲守兼優長於綜核粵省前數年庫儲奇絀洋款部餉以及本省餉需異常浩繁岌岌難支自該革員坐辦善後局

裁節浮糜力任勞怨款項日臻寬裕至臣去任之日善後局存款充然有裕此皆督撫衙門暨司局有案可稽者至各局有關係款目者委令兼理以便通籌會計其各局總理坐辦俱有專員臣俱時時接見各加詢考各有責成該革員從何把持其缺望無識者但憾其核駁之嚴從無人議其發款之濫所謂營私又不知其何據臣斷不敢自謂任用皆賢亦不敢保各員初終一轍第以一省之大人員之眾而專取貪劣之員萃之於省城又適處之以首府兩廳兩縣臣雖愚闇何至於此且臣離粵未及兩月各員卽易節改操亦不能如此之速乃

游習開於臣任用諸員去之惟恐不力單銜空言不謀於眾誠不解其何心竊念黜陟爲朝廷大典用人係疆吏專責臣渥荷厚恩厯典封圻竭力整飭吏治最惡貪風若以省會首劇官民具瞻所任各員盡屬貪邪愚闇至斯何能再勝疆寄儻各員被參冤抑臣離粵未及旋踵卽遭此不白顧乃明知其枉緘默不言他省屬員俱爲寒心此後亦誰肯爲臣盡力可否仰懇天恩飭下兩廣督臣李瀚章將革員王秉恩王存善魏恒等原參把持營私鑽營牟利各實蹟分晰查明覆奏以定是非而昭折服若所參皆實情真罪當該革員等旣所甘心臣

任用非人責有攸歸亦應由李瀚章據實將臣奏參請旨交部嚴議以爲專用劣員者戒是否有當理合恭摺奏陳不勝惶悚屏營之至

硃批另有旨欽此

查勘隄工摺

光緒十六年六月十六日

竊照湖北荊州萬城大隄本年夏秋二汛輪應臣前往督防業經奏明派委荊州府知府舒惠駐工代防並聲明隄工險要擬於五月中旬親往查勘並順道勘驗鍾祥潛江等縣新修隄工等因在案臣當卽部署一切輕裝減從於五月二十四日自省起程乘輪船上駛二十

六日前往石首縣屬大隄南岸藕池口楊發腦新開水道暨調絃穴等處察看荆江南入洞庭湖水勢二十七
八兩日駛赴北岸沿途查看郝穴登南局觀音磯楊林
磯各工該處頂衝迎溜均有挑水石磯工程尙稱穩固
二十九日抵荊州府城連日查勘北岸大隄官民土石
各工歷屆歲修均尙堅實足資捍衛周覽形勢蓋自咸
豐以來石首之藕池口公安之斗湖口江陵之毛楊二
尖松滋之黃家埠等處相繼潰口荆江分流入湖盛漲
之時虎渡調絃二口江溜均仍係南趨得以分洩江水
北岸濱江各險江水衝激之力少減是以歷年得免漫

決之患惟近歲潦水泛漲異常秋汛尤防陰雨已切飭該府舒惠駐工督率防護務保無虞臣勘畢荆隄卽由陸路馳赴安陸府鍾祥縣於六月初三四等日勘驗鍾隄三四八九各工新修坦坡石壩月隄及新築磯嘴所有內外撐幫碣工收分均尙合法惟六工迎溜內係深潭四五七等工上年積水亦多今年三月內襄河卽已盛漲水來過早新工甫竣隄脚尙未乾透間有被水冲刷之處又十三工隄內脚十六工壩頭皆係舊工微有坍塌並飭趕緊修補設法疏消積水隨卽順道勘驗潛江隄家洲新築月隄工程尙屬完固查襄河湍悍各工

冲刷最易目前增漲未已當飭安陸府知府史書青督率鍾祥潛江兩縣加意防護多加內幫築壩務令寬坦不可過於峻狹遇有險工隨時搶築抵禦前奏明添設襄陽樊城等處商局電綫已經開工此後信息靈通防護較易得力臣先後將各隄要工勘畢卽乘船由襄河下駛於六月初六日回抵省城
硃批知道了欽此

察看藕池口情形片

光緒十六年六月十六日

再查湖北石首縣屬藕池口本荆江南岸大隄咸豐二年潰決成口荆江橫折而南北岸隄防之患稍紓而江

卷之二十一

三

水入湖挾泥沙以南趨西湖一帶淤地成洲土人名曰南洲地廣土沃土客互爭草澤嘯聚實爲湖南隱患且淤洲日寬湖面愈狹內水阻遏不消濱湖州縣胥受其灾前任湖南撫臣王文韶奏明有案前經臣札飭署岳常豐道莊賡良查覆據該道稱湖南省紳民建議堵築藕池口以止淤漲分疏虎渡調絃二口以洩江水臣此次親至藕池口察看口門寬至五百餘丈以三十年分疏巨口一旦堵塞荆民必羣起相爭勢難率行舉辦至虎渡調絃二口冬令雖屬淤淺現今盛漲江水暢行水患不在冬令亦可勿庸分疏只可另議妥善辦法期於

南北兩省均無妨礙或酌量堵塞他口或疏濬湖內水道或禁止淤洲私築圍埝以期讓地與水至南洲地方縱橫二百餘里應如何清丈升科設官分汎以息鬭爭而弭隱患容與湖南撫臣張煦籌商周妥再行會同奏明辦理

硃批知道了欽此

整頓土藥稅項籌擬辦法摺

光緒十六年八月二十四日

竊臣等承准軍機大臣字寄光緒十六年四月十五日奉 上諭總理各國事務衙門戶部奏整頓土藥稅釐一摺內地栽種土藥爲中國出產大宗前據該衙門會奏

請飭各省酌量加稅當依議行誠以洋藥充斥久爲中國漏卮近來民間栽種日多獲利甚重駸駸有不可復遏之勢果能設法稽查認真辦理既可裨益餉需且亦收回利權之一助並可以徵爲禁隱寓崇本抑末之意乃各省數年之間迄無切實辦法近聞土藥出產日繁各該省局卡徵收稅項弊端百出盡飽私囊徵多報少於國課毫無裨補含混欺飾實堪痛恨若不及時整頓於洋藥併徵辦法大有關礙稅數必將日絀著詳察各該省地方情形或於出產之處就地徵收或於販運過境嚴查走漏或卽就現在私收之項和盤託出悉數歸

公其從前匿報之員朝廷姑從寬典不追既往著一併
免其參處經此次嚴諭之後各疆臣務當破除情面實
力稽核卽將各實數詳查聲覆按季專款開報不得於
百貨釐金內籠統聲敘著勒限三箇月各將原定新定
各辦法迅速覆奏不准空言塞責該衙門前飭總稅務
司赫德查開各處出產銷路暨價值釐稅數目卽著咨
行以備參考等因欽此並准總理衙門鈔錄原奏並赫
德申呈二件咨行前來卽經札飭藩司牙釐總局會議
籌辦懍遵諭旨就鄂省情形詳加體察切實整頓謹將
原辦情形及現擬辦法分別爲我 皇上陳之查鄂省

土藥先係抽收釐金嗣於咸豐九年遵照戶部奏案改釐爲稅照洋藥科則每百斤征稅銀三十兩於宜昌之平善壩襄陽之老河口荊州之沙市設局收稅嗣將老河口分局移設樊城土藥完稅後經過本省局卡驗票放行落地售賣者每兩收釐金錢九文鄂中本非出產之處近雖宜昌施南鄖陽等府山僻之處間有種植爲數無多入鄂之土藥以川土爲大宗雲貴陝甘各土亦有來者聚市於漢口沙市等處分由平善壩沙市樊城三局收稅宣施等府所產卽在各該局一律納稅從前暢旺之年曾收稅銀七八萬兩以後遞年漸減至三四

萬兩至光緒十三年間於巴東縣屬之野三關設局收稅沙市一局改爲補抽漸有起色十五年一年始復徵至七萬餘兩此鄂省原定藥稅辦法及歷年收數之實在情形也查鄂省藥稅之絀各局卡尙無私收入已情弊皆由此項土藥商販多係刁悍不逞之徒挑夫百十爲羣專以挾制闖越爲事而山徑紛歧防不勝防各局卡多設於荒僻之區止有巡丁一二十人自揣力有不敵其肯從該卡經過者恐其抗拒生事不得不含糊忍讓減折抽收愈趨愈下其繞越山箐歧路者亦不敢認真查緝以致銷日多而稅日少藥稅之愈絀實由於此

臣之洞到任後查知以上情形卽會商前撫臣奎斌銳意整頓密派委員分投察訪又查知川黔等省土藥由西陽州繞運湖南等處者多由來鳳縣南關過河復經會同臣繼洵派員設卡嚴爲堵截正在分別籌辦間欽奉諭旨飭辦自應欽遵大舉整頓以期一掃積弊查赫德所議土藥每百斤照洋藥稅釐共徵一百一十兩若能照此抽收餉項自更可饒裕惟土藥之質本遜洋藥近來民間所以多種暢銷者則以其價較洋藥略賤究之洋藥整箱裝運但須併徵一次土藥則銷路愈遠釐稅愈多今若加稅過多行銷必滯透漏益工轉恐有名

無實且毆魚毆爵事在意中亦未足仰副收回利權之
聖意臣等督飭司道牙釐局詳加籌議厯查鄂省藥稅
短絀之故非關稅數之少實由各路偷漏減折之多部
章原定每百斤征稅銀三十兩實係折衷至當若再有
增加商力亦難辦到此時惟有恪遵部章每百斤實收
十成足數銀三十兩隨征耗銀四兩七錢不准絲毫減
折亦不准稍有浮收實力稽征嚴杜偷漏庶於國課商
情兩無妨礙而偷漏絕則貨數必旺成數足則稅項自
贏是已寓加於不加之內查川土入鄂南路以宜昌施
南一帶爲水陸要隘大幫皆出於此必須奏派文武大

員督辦方足以資彈壓而期整飭現於宜昌府設立土藥專局檄委湖北候補道吳廷華總辦局務其野三關平善壩及新設卡之來鳳西關均爲分卡沙市爲查驗野三關及來鳳稅票補收漏稅之分卡各處收數均歸宜昌專局考核稽查以期水陸一氣骨節靈通其北路則由四川大甯陝西漢中運入鄖陽府屬之竹山竹谿房縣保康等處山徑紛歧四通八達襄樊一帶亦頭頭是道今照十成足數收稅土販惟利是視必更將添約夥眾鋌而走險抗拒嘗試斷非司事巡丁所能彈壓且該販等翻山踰嶺四路繞越亦非各卡寥寥數人所能

追緝非資兵力斷無成效惟是鄂省營勇無多各有分
防地段無從抽調綠營疊經裁汰額少習疲堵截難期
得力查有署宜昌鎮總兵羅縉紳才長心細辦事結實
久在宜昌任內熟習川楚交界地方情形素爲該處軍
民所信服當經照會該鎮會同道員吳廷華辦理責成
該鎮以緝私彈壓現經該鎮親身周歷施南宜昌山內
查明要隘歧途在利川縣者曰汪家營李子坳兩處咸
豐縣者曰忠堡歸州者曰龔家橋平陽壩兩處巴東縣
者曰野三關東湖縣者曰南津關天柱山羅天溪龍泉
鋪四處宜都縣者曰紅花套茶店子兩處恩施縣者曰

七里坪宣恩縣者曰李家河來鳳縣者曰西關皆係私販熟由之路飭令酌募緝私巡勇分派地段查緝梭巡如續有查出之路及情形或有變遷隨時酌量添改務令無從飛越其北路襄鄖一帶並已派員詳查以光化縣屬之老河口爲扼要之地應於此設立專局於樊城設立分局此外如竹山縣屬之官渡河馬門子河竹谿縣屬之小河口關垭子郭家洲鄖陽縣屬之黃龍灘房縣城外及下店子范家垭子均州屬之孫家灣均應設卡補抽駐勇巡緝其有河道者量設巡船以杜趨避繞越惟距南路過遠宜昌專局不能兼顧應另委幹練可

靠之員專辦北路以與南路相輔而行合計南北兩路
隘卡二十餘處延袤一千七八百里南路約需緝私巡
勇三百餘名北路約需二百餘名始足以資彈壓截緝
之用此項巡勇係爲杜緝土藥私販而設所需經費應
卽在土藥稅項下開支就地取材以免另行撥款此條
爲整頓藥稅之根斷不宜省照此辦法半年之後收數
必可大有起色各卡專爲杜截土藥繞越不與百貨釐
金相涉其地均係山僻深遠邊防要地卽蜀湘兩省交
界處所游會各匪亦可並資防緝據該鎮道等會稟宜
昌專局已於七月十八日開辦體察商販情形皆知此

係特旨飭辦之件且派有文武大員督辦各路分卡均有巡勇截緝聲勢壯盛似尙能遵章完納臣等復經三令五申嚴核委員功過以後如再敢有仍前故縱減收者立予撤參示懲其官差兵勇各船夾帶私土者查出一併從嚴參辦至土藥落地釐金爲數有限與稅項係屬兩事向來按兩抽收行之既久毫無弊竇自可照舊辦理所收藥釐係於百貨冊內專款開列按半年奏報一次土藥稅銀則係由司分年分款造冊報銷今既欽奉諭旨以後自應將土藥稅項按季另冊造報此又奉旨以後現擬辦法之實在情形也查鄂省現擬整頓藥

稅之法實已不遺餘力惟土藥通行甚廣不盡銷售鄂省必須鄰省通力合作互相稽查方能益收實效應請旨敕下湖南河南江西安徽各省於交界處所設卡盤查如有鄂來土藥驗無湖北省稅票印花者卽係偷漏無疑應罰全數充公似於鄂省及鄰省餉項均有裨益如此則奸商無從趨避稅項必可日增硃批該衙門知道欽此

勘定煉鐵廠基籌辦廠工暨開采煤鐵事宜摺

光緒

十六年十一月初六日

光緒十六年閏二月十八日承准總理海軍事務衙門

光緒十六年二月二十九日會同戶部具奏遵議粵督李瀚章奏請將廣東煉鐵廠量爲移置一摺黏抄原奏內稱查湘鄂煤鐵既經張之洞訪知可恃自應准其將此項機器改運鄂省擇地安設較爲直截簡便第煉鐵爲造軌之基其後半價值及營建廠屋之需自當由部撥每年二百萬兩內劃撥究用若干應令先行估定報明立案等因本日奉旨依議欽此咨行到鄂欽遵辦理當卽於湖北省城設立鐵政局遴派奏調差委指分湖北補用道蔡錫勇會同在省司道總辦局務陸續訪求外省通曉鑛學之委員學生咨調應用自臣到鄂後

隨時將籌辦煤鐵情形電請海軍衙門核示遵照疊次覆電辦理嗣於七月內承准海署七月二十八日電開廠地既經勘定令卽舉行由臣自行奏明等因伏查設廠煉鐵濬利源而杜外耗爲中國創辦之舉工程浩大端緒紛繁約以開鐵采煤造廠爲三大端自上年冬間疊次承准海軍衙門咨電後卽將臣前在粵省訪募英德各國鑛師洋匠化學教習人等咨調來鄂於上年冬臘間陸續到鄂卽經臣派員帶同外洋工師赴大冶興國等州縣及沿江上下游一帶查勘煤鐵並委員分赴湖南及四川邊界查訪煤窿於本年春間先後查勘回

省查明大冶縣鐵山實係產旺質良取用不竭距江邊黃石港僅五十餘里興國州產有錳鐵尤爲煉鋼所必需適與大冶接界至煉鋼煉鐵以白煤石煤爲最善或用油煤煉成焦炭亦可湖北之荊門當陽產有白煤興山歸州巴東亦產白煤爲數較少湖南之寶慶衡州永州三府所屬各縣地方及接界之四川奉節巫山江西萍鄉所產白煤石煤油煤焦炭尤爲旺盛均屬一水可通帶回煤鐵質樣當發交洋匠用化學藥料詳細化煉分別等差大率鐵鑛每百分以鐵質多至五六十分內含硫質在二釐以內磷質在一釐以內者爲合用煤以

灰在十分以內炭質在八十五分及九十分以外者爲合用大冶之鐵鑛鐵質六十分有奇湘鄂各煤合式可用者共有二十餘處至建廠一節查大冶開采鐵鑛煉鐵廠自以附近產鐵地方爲最善惟該廠基及儲廠屯煤處所長三百餘丈寬六七十丈地宜平原高阜兼通水運大冶通江之黃石港地方現任山東登萊青道盛宣懷曾於光緒三年帶同洋鑛師郭師敦查勘煤鐵據稟周厯大冶縣屬上自黃石港下至石灰窰尋覓安爐基地或狹小或卑濕再三相度僅有黃石港東吳王廟旁尙敷安置惟地勢不高難免水患旁有高地一區又

形狹隘道光二十九年曾被水淹復赴樊口履勘武昌黃岡縣屬南北兩岸上下百餘里據鑛師云南岸多山隴少平原北岸多沙洲少堅土合觀大概卽求如前勘黃石港東基地亦不可得等語稟鄂有案查該道所稱安爐基地係擬設出鐵四十噸之機爐已難得地今所購機爐每日出鐵一百噸兼有煉鋼造軌及煉熟鐵鑄鐵貨機器廠地寬廣宜加數倍臣疊派鑛師洋匠暨道員徐建寅督率測繪員生前往查勘該港沿岸平處皆屬被水之區其高阜僅寬數十丈斷不能設此大廠據徐建寅稟稱須將山頭開低數丈仍留山根高於平地

三丈再將平地填高始可適用勞費無等山麓兼有墳數十冢礙難施工復飭於省城各門外及沿江沌口金口青山金沙洲沙口一帶上下數百里尋覓測量非屬低窪卽多墳墓否則距水較遠濱江無一廣平高燥之處茲勘得漢陽縣大別山下有地一區原係民田略有民房長六百丈廣百餘丈寬綽有餘南枕大別山東臨大江北濱漢水東與省城相對北與漢口相對氣局宏闊運載合宜當經督飭局員及學生洋匠詳加考核僉以爲此地恰宜建廠大率其利便共有數端荆湘等煤皆在上游若下運大冶雖止多三百餘里上水回船旣

無生意運脚必貴今設漢陽懋遷繁盛商販爭趨貨多
價賤其便一也鋼鐵煉成亦須上運漢口銷售並須運
至槍礮廠製造今煉成發售如取如攜省重運之費其
便二也人才難得通達洋務諳習機器者尤不易覲鄂
省鐵布槍礮三廠並開斷無如許之多精通得力委員
分投經理至西洋工師繪算各生尤不敷用今鐵礮槍
礮廠並設一處鑛學化學各學堂俱附其中布礮亦在
對江皆可通融任使其便三也員司虛浮匠役懶惰爲
中國向有之積習不可不防礮距省遠料物短數煤斤
攪雜百人僅得八十人之用一日僅作半日之工出鐵

不多不精成本卽賠今設在對江督察甚易其便四也
官本二百餘萬兩常年經費貨價出入亦百萬餘兩廠
在省外實缺大員無一能到廠者歲糜巨款易動浮言
今則督撫司道等皆可親往察看百聞不如一見其便
五也鑛渣煤渣每年約出三萬餘噸除填築本廠地基
外兼可運往漢口後湖填築湖身漢口城垣可免盛漲
沖灌沿湖民居可免淹浸其便六也惟廠外緣漢水之
舊隄低薄須一律加高培厚以防盛漲全廠地基關繫
最重其生熟鐵爐座基址須填築丈餘餘亦酌量墊高
堅築並須於沿江沿漢分築馬頭於江岸到廠之路安

設鐵軌以便運鑛火車據洋匠估計此工若在外洋三年乃成中國人工易集自八月初勘定厥基之日起兩年爲期約可開爐造軌現仍設法竭力趕辦務期早成一日有一日之益約計成本運費將來造成鋼軌總較洋軌爲廉現擬一面出示曉諭鄂湘兩省及鄰近出產佳煤地方令民間廣爲開采酌定價值隨時收買濟用采運旣多自可不至居奇一面派委員暨鑛學學生前往湘省覆勘察其窿口形勢運道難易能否用機器開采相機酌辦近復於大冶之王三石明家灣兩處地方探得石煤油煤業經試用土法開采惟深入數層有無

改變目前購辦鑛地機器未經運到尙無把握如果煤質一色出產亦旺堪以鎔煉鋼鐵卽當速購機器大舉開采益爲合算蓋武備所需及輪船機器民間日用農家工作無一不取資於鐵而煤之爲用尤廣實力開辦可大可久自強之圖實基於此臣惟有殫竭愚忱悉心經畫督飭各員趕購物料趲辦廠工一面興修大冶運道開采鐵鑛並興國錳鐵以備爐廠安妥卽可煉造一面籌辦運煤采煤事宜實事求是務底於成一切詳細事宜自當隨時電達咨呈海軍衙門商請核示辦理查此項工程需款甚鉅海軍衙門上年覆奏鐵路原摺內

稱西國中等煉鋼鐵爐約需銀一百四十餘萬兩正定
清化分設兩爐約需銀二百八十餘萬兩等語第就購
爐設廠而言其修道運鑛開采煤鐵等費均不在內原
奏言之甚詳今鄂省開設煉鋼鐵兩爐及抽條夾板造
軌各機器詢據外洋工師僉稱爲上中等機爐在外國
亦稱大廠更兼采鐵煉鋼開煤三事合而爲一復有修
運道築江隄設化學鑛務學堂添修理機器廠皆連類
而及必不可少之費所需尤多前海署來電擬以二百
萬兩撥歸湖北爲煉鐵之用深恐不敷前於三月初十
日電達海軍衙門在案現在約估大數需銀二百四十

餘萬兩計戶部劃撥京餉暨鄂省本年認籌銀五萬兩
共撥到銀一百萬兩目前趕辦工料及經始開采煤鐵
等事動需鉅款各項經費均須湊手始能一氣呵成以
後續撥之款必須源源接濟方免停工待款轉滋糜費
蓋此項工程以廠屋造竣安就機爐造成鋼軌鐵料爲
度用費確有限制並非永無底止之款以後常年經費
只須第一年先行籌墊若干廠內所出之鋼軌鐵料銷
售得價收回貨本卽是經費本年三月准北洋大臣李
鴻章電稱撥用鄂軌隨撥隨付價界限乃清等語當以
所籌甚當電達海軍衙門在案俟軌價付到以後卽可

藉資周轉以後鋼軌鐵料銷售愈推愈廣循環不窮無須另耗常款臣自當隨時核實摺節辦理惟續撥之款必須於明年春間撥到趲辦各工一切始能應手已咨呈海軍衙門商請核辦合無仰懇天恩飭下戶部卽將續撥之款一百萬兩早爲籌定俾得及時撥給趕辦竣工實於要需有裨

硃批該衙門議奏欽此

湘省安設電綫片

光緒十六年十一月初六日

再湖南湖北兩省中隔重湖文報往來遇有阻風動淹旬日平時已覺呼應不靈設遇地方緊要事件尤虞遲

誤前擬將荊州商局電綫由沙市過江接造至湖南澧州經長沙省城直抵湘潭以通緊要信報湘潭以上能否旁出接造應俟臨時體察於本年閏二月間電商總理海軍事務衙門聲明俟將路勘定後再行具奏承准電復核准並咨明總理各國事務衙門在案旋卽咨商湖南撫臣札飭地方官體察民情妥爲曉諭以便開辦並委前湖南候補直隸州知州錢紹文馳赴電綫經過之澧州武陵龍陽益陽沅江甯鄉長沙善化湘潭等州縣會同該州縣等剴切開諭告以勘路安綫均用華工不用洋匠與民間墳墓田廬毫無妨礙茲先後接據湖

南藩臬兩司署岳常澧道莊賡良鹽法長寶道紹榮暨該印委會銜稟稱經各該地方官出示曉諭復會同委員傳集紳耆詳晰開導告以此事有利無害民間俱已曉然並無異議等情前來並准湖南撫臣張煦咨同前由臣查電報之設實於緊要政務有裨久經通行各省今既查明湘省民情並無阻礙臣擬卽札飭總辦電報事宜山東登萊青道盛宣懷由商電局自行籌款承辦趕備物料華工隨勘隨造早日觀成以利文報而裨商務將來修綫養綫經費統歸商局興工之日飭各該州縣會同營汛照料彈壓不令稍滋事端

硃批該衙門知道欽此

廣昌輪船撥歸鄂省片

光緒十六年十一月初六日

再上年冬間臣由粵省赴湖廣調任奏明撥帶後膛精槍車礮等件赴鄂當經飭調粵省廣昌兵輪運載前來鄂後因籌辦煤鐵需輪船應用查知鄂省輪船無多以之轉運餉項巡緝江面尙屬不敷粵省輪船素多臣在粵復添造廣甲廣乙廣元廣亨等大小兵輪十餘艘平時緝私捕盜內河外海駛用有餘查廣昌兵輪船身長中尺一百六十八尺寬二十四尺實馬力七百三十五匹本係木舢舨商輪便於裝運及長江行駛隨卽函商

兩廣督臣李瀚章以此輪係臣在粵由粵海關撥來未
出購價擬卽撥歸鄂省應用以省購買之費旋准李瀚
章覆函應允並稱不須付價囑由鄂省會奏當將該輪
改名楚材專歸鐵政局調遣以供撥運機器及將來運
煤拖鑛之用該輪在粵捕盜緝私時常出海勇數較多
舵工水手工費稍重月需薪糧等項一千二百三十四
兩二錢四分現爲轉運煤鐵之用長江非外海可比勇
數薪糧均須核減業於本年二月將礮勇水手酌量裁
減每月共需薪工等項八百三十四兩二錢四分油價
煤價行船計日核給向不在內除該輪薪工油煤等項

分別開具清單咨呈海軍衙門及分咨戶兵二部外謹
會同兩廣督臣李瀚章附片具陳伏祈聖鑒
硃批該衙門知道欽此

張文襄公全集卷二十九終

紹興孫家棟校

張文襄公全集卷三十

奏議三十

安籌槍礮廠常年經費摺

光緒十七年三月十八日

竊照前承准總理海軍事務衙門來咨光緒十六年二月十九日會同戶部具奏議覆廣東槍礮廠改移鄂省一摺粘鈔原奏內稱開廠後常年經費應由湖廣總督張之洞豫爲安籌奏明辦理等因本日奉旨依議欽此欽遵咨行到鄂並准戶部咨同前因業經遵照籌辦嗣因購造槍彈礮彈機器及添購捲銅等機器一切雜費勸令提督劉維楨捐助鉅款復由粵籌專款建造廠屋

暫借湖北糧道庫款應用均經奏明奉旨允准在案查上年正月初四日承准海軍衙門電開總以將來軍旅之事無一仰給於人爲斷雖不必卽有其效萬不可竟無其志又正月十三日電開鐵爲廠根移廠就鄂分濟各省事功亦有倍半之別各等語方今時局多艱武備最爲當務之急故海署之意亟欲講求軍實開拓風氣以爲自強之圖經畫閔遠志意堅定指示剴切臣自應遵照竭力籌辦竊以爲天下艱鉅之事成敗則俟之於天立志則操之在己志定力堅自有功效可觀海署前電誠爲今日自強扼要之論臣督飭委員洋匠悉心考

求通盤籌畫計原定造槍機器一分每年能成新式連珠十響毛瑟槍一萬五千枝造礮機器每年能成克虜伯七生半至十二生行營礮臺礮共一百尊又應添購造槍礮藥造白藥造彈造礮車造礮架各機器每槍一枝隨彈五百顆每年須成槍彈七百五十萬顆每礮一尊外洋向規隨彈三百顆茲權按最少辦法亦須隨彈二百顆每年須成實心開花各種彈共二萬顆統計一切工料員匠雜項常年經費約需銀七十五六萬兩計一年所造槍礮全分比較外洋買價所省已多特款鉅難籌此次開廠試辦所有槍礮藥彈先擬每年各造一

半約需銀四十餘萬兩若製造之數再少工本反貴轉不合算當此度支極絀之際海軍衙門及戶部既難籌撥各省一時斷不能遽有撥款囑鄂代造機器現已運到開閣必致鏽壞且人工亦須練習始能漸臻精熟惟有就鄂省財用自行籌畫騰挪查有湖北省土藥稅一項近二十年以來所收稅銀大率每年少者僅二三萬兩多者六七萬兩內光緒七年一年收數較旺亦不能甚多臣詳加體察戶部原定稅章每百斤收銀三十兩隨徵耗銀四兩七錢本極允當歷來未能核實徵收漏稅甚鉅若照章收足每年可成鉅款可供槍礮之用臣

到任兩三月後查知情形卽經力排眾議詳考要隘添設局卡雇募巡勇遴委文武大員多方勸諭實力稽徵嗣奉旨整頓曾於覆奏摺內聲明在案開辦之始浮言萬端臣一力堅持自上年七月新章開辦之日起截至十二月底止較之光緒十五年收數已經加倍商情帖服接踵而來毫無異議雖月有淡旺一年牽算較之往年總可多收銀十數萬兩上年十一月准戶部咨令將徵收前項稅釐等款存儲聽候指撥毋得擅行動用等因查鄂省土藥稅銀历年俱係撥充協餉及本省要需與洋藥稅銀向歸候部撥用者不同臣與湖北撫臣譚

繼洵暨司道等熟商此項稅銀現經竭力整頓如事無更變每年除局用經費外約可收銀二十萬兩擬卽全數撥充槍礮廠常年經費其每年應解協餉及本省要需仍隨時騰挪籌撥不誤若能格外暢旺除去局用經費能收至二十萬兩以外仍當留充餉需緣此項土藥稅係新經整頓得來其舊有者本非向來解部之款其新增者更非湖北司局向來所有之款查四川機器製造局卽係奏明支用土藥稅釐今鄂省槍礮廠係海軍衙門奏明奉旨特辦較之川省製造局大小懸殊關係尤重常年經費爲款甚鉅惟有仰懇聖恩准將此項土

藥稅銀二十萬兩撥充槍礮廠常年經費此係專案遵旨妥籌奏明辦理之件他省自不能援以爲例又查光緒十年鄂省因辦理江防奏請將楚岸行銷之川淮各鹽每斤暫行加抽錢二文以充江防餉需嗣因籌解海軍衙門北洋海防經費又奏明以此項湊解約計淮鹽加抽每年約可收銀六萬餘兩川鹽加抽約可收銀十萬兩現與撫臣商酌并督飭司局通盤籌計設法騰挪除淮鹽加抽江防銀六萬餘兩仍留作本省湊解北洋海防經費外其不敷之數另行於釐金項下設法整頓騰挪湊撥總以照案解足爲度卽將川鹽加抽銀約十

萬兩騰出一併撥作槍礮廠常年經費專款合計土藥稅及川鹽江防兩項每年約可得銀三十萬兩以充槍礮廠常年經費目前購機購料待用孔亟土藥稅應請自上年七月新章開辦之日起川鹽加抽本年尙須湊解餉需應請自光緒十八年正月起此外尙不敷銀十餘萬兩容臣再行隨時籌畫奏明辦理總以不誤解部之款爲斷但僅造一年究不足以盡此項機器之用且核計工費亦較多俟將來各省如能撥款由鄂代造則隨時收回價本卽可推廣多造更爲相宜伏查鄂省新設槍礮廠所造各械皆係南北洋廣東山東四川等省

製造局所無者各省局間有一二處或能造槍既係舊式且所出甚少鄂廠所造克虜伯各種車礮尤爲邊防海防陸路戰守必不可少之利器德國陸戰以此制勝雄視歐洲方今外洋各國陸戰無不以礮隊當先較之槍隊遠勝數倍厯經詢考近年洋戰克捷之將士所論僉同此等精利軍械若專恃購之外洋不獨財用外耗如前大學士左宗棠奏疏所言以銀易鐵實爲非計且萬一遇有緩急敵船封口洋埠禁售受制於人購運均無從下手況陸續遠購之器種式參差彈碼各異動致誤事兼之或係舊槍改造或彈碼已受潮濕朦混居奇

種種流弊極費考察挑剔此皆前數年海防緊急時臣所身歷而目覩者懲前毖後當此國家閒暇之時未雨綢繆之計斷不可緩故特建議奏陳設廠自造在粵則訂購機器來鄂則請移廠所懍遵光緒十一年五月初七日諭旨時時以事過輒忘爲切戒計先後在粵在鄂設法籌措購機造廠添製各彈機器等費共七十餘萬兩均係由外另行籌捐之項並未稍動司局各庫原有之款查南北洋各省製造局凡購機器造廠屋等費皆係奏請動支庫款其常年經費又經部撥歲有定款鄂省開設槍礮廠事同一律而所造之械又出乎各局之

外地處南北之衝分濟水陸各省均屬便利以前購機造廠等費外籌實已不少此後常年經費現經奉旨妥籌惟有就鄂省力所能及通盤籌畫於無礙京協各餉之款請旨撥定以爲此項槍礮廠專款查川鹽加抽一項本係鄂省近年新增之款至土藥稅一項雖係舊有而新增之鉅款實係新經臣整頓所得且與向來聽候部撥之洋藥稅迥然不同舍此兩款之外實屬無可再籌合無仰懇天恩俯念此舉爲自強經久至計利害所關不獨湖北一省准將土藥稅銀及川鹽加抽江防兩款撥充槍礮廠常年經費專款俾得多造精械以備分

濟各省緩急有資其爲裨益江海防務實非淺鮮至於鄂省向來應解京協各餉臣必當竭力籌措照案解足將來槍礮開廠後各項用款臣自當督飭局員核實撙節辦理專案咨報查核硃批該衙門議奏欽此

查明茶商捐助書院學堂經費商情樂從摺

光緒十七

年五月二十一日

竊臣承准軍機大臣字寄光緒十七年三月初二日奉上諭有人奏風聞張之洞於上年四月間令湖南茶商分別輸捐作爲創修兩湖書院經費該商疊請邀免批

斥不准近來茶商賠累請飭一律撤銷等語連年中國
茶葉銷路不暢由於成本太重所奏茶商輸捐一節如
果屬實自應裁撤以恤商困著張之洞查明覆奏原片
著鈔給閱看將此諭令知之欽此臣祇奉之餘仰見
聖主體恤商艱之至意欽悚莫名謹將修建書院緣起
及籌捐辦法情形敬爲我 皇上陳之查湖北省城現
在修建之兩湖書院卽係舊日之經心書院該書院係
同治八年臣前任湖北學政時會商督臣李鴻章撫臣
郭柏蔭籌款建造專課經史古學其時因經費不充規
模草創齋舍無多其地適濱都司湖畔地勢頗窪湖身

日淤積水日阻自光緒十三年十五年湖北兩次大水
城內多被淹浸經心書院內水深三尺有餘院內諸生
概行遷避他處臣於光緒十五年冬間調任湖廣總督
抵省後閱視書院積水甫退壁間水痕宛然諸生仍未
返院牆宇屢經淹浸多就傾頽至江漢書院屋宇尤少
膏火素薄鄂省連歲災祲之後寒士生計益覺蕭條接
見諸生見其棲止無所景況單寒甚爲可憫據該監院
諸生等僉稱近二十年來湖北績學好古之士日增月
盛率皆經心書院肄業之人科名尤盛以故來學日多
課額屢廣齋舍旣不能容膏火亦復無多其曾經學臣

札調各送入院而不得住院者尙有二百數十人聞臣
來鄂僉以重修書院增加課額膏火爲請省內省外耆
紳儒士異口同聲臣察其嚮學情殷情詞懇切自不可
無以慰其企望當經就其在院貧苦者捐廉量予資獎
至十六年夏間始建重修經心書院之議墊高地基疏
消水道添造齋舍購置書籍延訪名師講求明體達用
之學而湖南人士游幕游學僑寓鄂省者向來最多聞
有重建書院之舉皆願附入肄業查臣前在兩廣總督
任內所建廣雅書院係合廣東廣西兩省士子俱入其
中今湖南諸生援此爲詞自亦未便歧視當經酌定課

額徧及邊遠各府州以示公溥今春咨行兩省選調諸生卽經聲明俟書院規模大定再行專案奏明立案此創建兩湖書院之原委也至書院兼括兩省額數較多用度較繁當經與司道籌議查湖北湖南兩省各書院經費大率皆出鹽務所捐爲數已多因查漢口商務以茶務爲大宗向分湖南湖北兩幫每年貿易生理核計約有一千餘萬兩向來籌捐亦惟茶捐爲最鉅自同治初年以來南茶向抽餉捐每百斤捐銀二錢八分至光緒五年每百斤減爲一錢四分專充漢口鎮團防緝捕之用嗣於光緒十二年因漢口團防等事漸少甫行停

收業北茶者向係紅茶每百斤捐銀七分餘茶遞減至一二分不等以充漢口堡工經費行之已三十年現仍照常抽收上年二月因戶部咨查茶釐情形當經據實咨覆在案查北茶有稅有釐南茶因在湘省完釐到漢口後並不抽其釐然北茶有捐而南茶無捐南北辦法兩歧亦欠平允當經飭令署江漢關道李壽蓉暨湖北候補道曹南英等前往商之南茶各商勸令捐助書院經費並詳體商情照舊案每百斤減爲抽銀一錢該商等均各欣然樂從毫無勉強其北茶亦勸令每百斤捐助書院經費銀三分連堡工捐合計亦係一錢俾令南

北捐數畫一以昭平允大約南茶捐數每年不過一萬餘金僅敷南省士子膏獎盤費一切之用北省經費係屬另籌此係就該商多年舊案之捐爲該省嘉惠士林之舉而捐數又甚輕減楚弓楚得似不致有拂商情此南茶籌捐之原委也自開辦以後抽收極爲踴躍僅止去年秋間有人具稟求免當飭署江漢關道江麟瑞及原辦道員曹南英查詢各商乃係湘省一、二家素無資本好訟生事之人所爲並非出於茶行公議眾商均不以爲然各商既輸捐如常祇可置之不論不議此次欽奉寄諭後當經派委江漢關道孔慶輔會同鹽法道瞿

廷韶暨候補道曹南英等查詢商情切實籌議查中國
茶葉爲出口商貨之大宗近來洋貨暢銷財用外耗全
恃絲茶兩項行銷外洋藉資補救事關大局臣到任後
屢經檄飭江漢關道傳詢各商並疊次商之各國領事
講求振興茶葉之法籌議設公棧開船港定公鑄禁抑
勒各章程厯厯有案可稽若果此捐於茶務稍有妨礙
及有商情不願之事臣愚豈肯出此惟查此項茶捐每
年總共所收不過一萬數千金合之價值千分取一眾
擎易舉其於茶務去取均無所增損是以商情樂從嚮
風慕義並請設商籍課額爲造就其子弟之計當經允

其所請於湖南北課額二百名外另立商籍課額四十名羣情益深鼓舞嗣臣復加考求向來南北業茶各商不通外國語言文字與洋商交易均另由洋行買辦爲之經紀商情隔閼弊竇叢生南茶各商尤以爲病復議於兩湖書院外另設方言商務兩學堂專習泰西各國語言文字及講求整頓茶務種植製造之法一切濬源塞漏通商惠工之事其經費卽就該商等所捐勻撥不敷之數另行籌足不令再捐各商子弟願入書院與學堂者均聽其自便昨經甄別書院肄業各生商籍中送及投考者至一百餘人之多士論歡欣羣情景附毫無

間言至原奏所言茶商虧折各節現經該道等詳悉諮訪茶商獲利與否惟視乎資本之厚薄茶色之美惡茶務向以頭茶爲重連年頭茶均屬得價今年頭茶價值最昂每百斤高者七八十兩低者三四十兩近年漢口洋人買茶專以俄商爲大幫買數旣多價值亦尙公平緣印度產茶澀而不香別有一種氣味熏製亦不能佳故俄人概不食印度茶專向中國購買各省皆知此次俄儲來華復向臣面言如此英人雖食印度茶仍須攙和中國茶食之此英領事自言如此實無洋商賤視中國茶之說每年茶市貲本豐厚者類皆獲利若零星商

販資本微薄不免揀焙粗率攙和雜物希圖朦售以致
洋商挑剔以後惟有督飭產茶州縣董勸商民講求種
植揀焙之法嚴禁攙和朦混之弊庶於商務可收實效
總之商務之盈虧全視乎出茶製茶之佳否實與此項
捐輸無涉該道等並傳集南茶各商面加詢問僉以書
院培植本省人才各商輸捐甚微收效甚大且學堂講
習洋文商務兼於茶務有益願仍照舊抽捐並無異議
臣仰體朝廷恤商至意當飭該道等諭知各商再加輕
減自本年四月起將湖南紅茶每百斤原議收銀一錢
者減爲六分五釐青茶每百斤原議收銀七分者減爲

四分五釐米勛茶每百斤原議收銀三分五釐者減爲
二分三釐黑茶甄茶東西口套篋等茶每百斤原議收
銀三分者減爲二分茶頭茶末茶梗等項每百斤原議
收銀一分五釐者減爲一分北茶原議捐三分者改爲
二分以紓商力各商益爲欣感大率南北茶價略分三
等每兩箱約將及一百斤每百斤上等價值銀七十兩
內外中等四十兩內外下等二十兩內外姑卽最少之
價計之每售價二十兩僅捐銀六分五釐爲數極屬輕
微斷無因此賠累之理況尙有售價六七十兩者乎是
此項捐數之有無實無關茶務之盈絀業據南茶各商

引之集卷三十一
等稟覆江漢關道毫無異詞現擬卽照此酌減之數抽
收辦理臣仍當隨時體察情形如稍有妨礙及商情不
便之處卽行奏明裁撤據江漢關道孔慶輔等會同查
明籌議詳請覆奏前來除俟書院學堂規模悉定再行
將詳細章程分別奏明立案外所有查明茶商捐助兩
湖書院暨方言商務學堂經費於士林商務均有裨益
眾商樂從並酌減捐數緣由理合恭摺據實覆陳伏祈
聖鑒訓示

硃批知道了欽此

辦結武穴教案摺

光緒十七年八月十九日

竊查本年四月間蕪湖等處滋鬧教堂之後沿江一帶謠言四起人心惶擾處處堪虞疊經臣嚴飭地方文武密切防範凡有育嬰教堂之處尤爲加意保護武穴地方距廣濟縣城七十餘里僅有武黃同知及龍坪馬口二巡檢駐紮向有英國福音堂而無育嬰教堂民教相安已久詎意四月二十九日傍晚有廣濟縣人天主教民歐陽理然肩挑幼孩四人行至武穴街外據云將送往九江教堂適爲痞匪郭六壽等所見誤信訛傳疑幼孩送入教堂卽遭剜眼蒸食肆口妄言激動公憤頃刻之間人眾麤集喧嚷肆鬧竟誤以武穴教堂爲卽收養

幼孩之處擲石奮擊入窗以致屋內洋油燈擊破失火延燒洋樓一層餘亦多有殘毀匪徒遂乘機攫取零星物件該處洋關分卡委員候補通判華聘三龍坪司巡檢鄒振清急往彈壓均被匪眾擲石毆傷其福音堂內教士包姓白姓兩洋人已先期一赴興國一往漢口僅留眷屬婦孺在堂適有武穴洋關分卡之扞手英國人柯姓外來散書之英國教士金姓當人眾喧雜之際馳往救火登時被匪毆斃教士婦女三人洋孩四人由後門逃出先投馬口司巡檢署該巡檢陳培周因眾勢洶洶未敢收留婦孺即經同知衙門及龍坪巡檢差役弓

兵陸續護送至武黃同知署該同知顧允昌留住署內
查知該洋婦三人在途次亦被匪徒毆傷次日各回漢
口臣聞報之後立飭地方官嚴拏首要各犯一面抽調
省外水陸勇營分投彈壓保護並飭江漢關道派員乘
輪船至武穴將斃命之英人二名照料護送回漢口另
派文武大員前往彈壓撫慰其時廣濟縣知縣彭廣心
已經馳至武穴緝獲多人除無辜訊明省釋外實獲匪
犯十名復經臣特委候補知府裕庚馳往廣濟會同黃
州府知府李方豫督同該縣切實審辦並飭關道照會
英領事飭取武穴教堂男婦各供並驗明洋婦各傷以

資參證研訊旋據該領事錄供照覆並聲稱洋婦受傷甚重其洋婦包氏一名經洋醫驗明恐致不能生育等情前來旋經訊明此案實因挑孩懷疑痞匪鼓煽滋鬧事起倉猝並無放火圖劫情事滋鬧之時適值該堂兩教士前數日早經他往自非有意蓄謀與該堂尋衅且該教堂內存有鐵櫃向係存儲貴重物件並未搶去其非意在劫財無疑據郭六壽供認因見教民挑有小孩聽信訛言起意生事以致戴鰓魚與各匪附和滋鬧打毀教堂住屋器物並有毆傷委員巡檢之事實係該犯起意煽眾並下手用刀連砍致斃救火之洋關扞手柯

姓戴鰈魚供認下手用刀連砍致斃救火之洋教士金
姓等情不諱查律載共毆人致死下手致命傷重者絞
等語該兩犯事不干已鼓眾滋鬧殃及無辜均屬任意
逞兇形同土匪比之尋常共毆情節較重近奉五月初
七日上諭著各督撫迅飭該管文武查拿首要各犯訊
明正法以儆將來等因欽此自應欽遵辦理郭六壽戴
鰈魚二犯既據該委員府縣覆訊明確實係此案首要
正犯未便稍稽顯戮當卽批飭將該兩犯就地正法傳
首犯事地方示眾以昭炯戒其幫毆及毆傷洋婦攫取
零物之從犯八名當飭委員知府裕庚會督該府縣覆

訊確供將英領事先後所指要證民人陶春燦及弓兵田德等三名教民范修興等四名柯扞手廚役王七賢一名一共九名一律傳到質訊明確按照律例擬議罪名核辦去後旋據稟稱據胡東兒供認執有小鐵尺毆傷柯扞手頭上據胡視生供認拾起石塊打傷柯扞手頭上呂二弟供認摸著石塊擲傷金教士許逢春田福兒二犯各供認於人叢中碰撞洋婦不知是否受傷許逢春並檢拾零物旋即拋棄陳連升供認檢拾零物亦即拋棄于老五范四妹二犯各供認聞亂想欲檢取物件人多未能擁上各供不諱反覆研鞫堅執不移質之

各要證亦無異詞供情毫無遁飾應卽擬結查例載凡同謀共毆人除下手致命傷重者依律處絞外其共毆之人審係執持槍刀等項凶器傷人者發近邊充軍又律載搶奪傷人爲首斬監候爲從減爲首一等並刺字若因失火而乘時搶奪人財物者罪亦如之又例載鬪毆令至篤疾以致不能生育者杖一百流三千里又例載因失火而乘機搶奪除有殺傷又計贓重者仍照定例問擬外其但經得財罪應擬以杖徒者俱照本例加一等治罪爲首之犯杖一百流三千里爲從者杖一百徒三年刺字又例載搶奪不得財問不應又律載不應

爲而爲事理重者杖八十等語此案胡東兒因聞洋人住房火起攜帶鐵尺往看見眾人圍打洋人該犯亦用鐵尺打傷洋人頭上查鐵尺係例載凶器應照共毆之人審係執持凶器傷人者發近邊充軍例擬發近邊充軍胡視生呂二弟各因洋房失火往看見眾人趕打洋人該犯等各拾摸石塊打傷洋人均應照搶奪傷人爲從減爲首罪一等律各擬杖一百流三千里並於右小臂膊上刺搶奪二字許逢春因洋房失火往看見人擁擠適遇洋婦該犯亦跟隨碰撞雖據供稱不知是否受傷惟洋婦受傷已據該印委等查明屬實卽就傷至篤

疾不能生育而論按律罪應杖一百流三千里該犯檢拾物件按照因失火而搶奪財物亦應杖一百流三千里二罪相等從一科斷該犯許逢春應擬杖一百流三千里並於右小臂膊上刺搶奪二字田福兒在人羣中碰撞洋婦雖據稱不知是否受傷並未檢取物件但碰撞洋婦與許逢春相同亦應按照毆人至篤疾不能生育杖一百流三千里律擬杖一百流三千里陳連升因聞洋房失火往看見眾人圍打洋人據供並未幫毆惟檢取零星物件該犯陳連升應照失火乘機搶奪人財物但經得財罪擬以杖徒者俱照本例加一等治罪將

爲從者杖一百徒三年例擬杖一百徒三年於面上刺
搶奪字樣干老五范四妹各因洋房失火眾人與洋人
鬧事想往檢取財物未經得財均應照搶奪不得財問
不應杖八十例各擬杖八十未獲之犯已懸賞緝拿俟
拏獲有人隨時審實照例懲辦等情稟由署湖北按察
使惲祖翼覆核具詳前來當經批飭照詳分別辦理署
馬口司巡檢陳培周因眾勢洶洶未敢收留婦孺以致
被毆受傷殊屬不合前已行司撤任並摘去頂戴以示
懲儆武黃同知顧允昌本係管理防護江堤向無緝捕
之責惟捕務非其所長現須會縣嚴緝未獲餘犯已將

顧允昌調省飭司另委妥員署理武黃同知飭令訪緝
餘犯已將審辦各犯照例從嚴科斷各節由江漢關道
照會英領事旋據覆稱均屬情罪允當無可異議此獲
犯懲辦之大概情形也至柯扞手金教士兩洋人無辜
殞命情殊可憫自應撫恤以昭朝廷懷柔遠人矜恤無
辜之至意擬給予該兩洋人家屬各洋銀二萬元武穴
教堂素與該鎮民間無隙此次因無干訛言懷疑鬧
致被焚毀並非該堂啟衅自應由官給款代爲修復並
補給堂內失物以示體恤應卽從優酌給洋銀二萬五
千元所有此案各款全數共洋銀六萬五千元合銀四

萬五千餘兩經江漢關稅務司與漢口英領事商明應允並無異言該領事現已稟其公使專候覆文到日即可收款完案此撫恤修復等款之大概情形也查沿江各省數月來疊次滋鬧教堂大都因收養幼孩而起故匪徒得以信口造謠愚民無知易爲所惑一旦事起倉猝彈壓不及遂釀鉅案臣於武穴滋事之後卽飭江漢關道照會各國領事轉飭各教士暫勿收養幼孩免滋疑惑俟各案辦結人心稍靜再行收養各領事均以爲然並飭關道會商領事妥議稽察章程每月定期常有員紳前往察看以釋羣疑若各處教堂皆能遵行使人

無可疑之端庶不至再有滋鬧之事臣已嚴飭地方文武隨時訪查如再有匿名揭帖捏造無根之言希圖煽亂務卽懸賞嚴拏欽遵五月初七日諭旨從重治罪以杜亂萌其未結之案英國僅有德安府徐輝與教堂滋鬧廣濟縣教民藍姓與族人爭論入譜兩起現均已辦理完結飭關道照會領事在案謹恭摺會奏伏祈聖鑒硃批該衙門知道欽此

添募勇營摺

光緒十七年八月十九日

竊臣等於光緒十七年六月十九日欽奉寄諭各省哥老會匪最爲地方之害此等匪徒行蹤詭祕動輒糾集

黨與乘機煽亂甚至造謠惑眾潛謀不軌若不先事籌辦絕其根株則涓涓不息將成江河後患何堪設想著各直省將軍督撫嚴飭地方文武實力查緝嚴懲首要解散脅從慎毋養癰成患貽害地方等因欽此仰見聖主思患預防除暴安良之至意當經恭錄咨行欽遵辦理並出示剴切曉諭各在案查此項會匪糾集夥黨結盟拜會開立山堂散放飄布黨與多者竟至數萬少者亦過千人歷來拏獲各犯起出飄布號簿偽印等件所有名目口號詞意顯然悖逆該匪等蹤跡詭祕聲氣靈通布滿沿江沿海各省陰謀不逞鄂省居江皖上游南

北交衝匪黨尤易混迹本年夏間沿江焚毀教堂之案
疊出延及湖北武穴會匪乘機煽惑散布謠言武漢地
方華洋雜處一夕數驚亟需勇營彈壓近年鄂省兩次
裁營節餉裁去步隊十六營通省僅餘步隊六營另有
鼎字一營係食淮餉專爲零星分布查緝淮北之私而
設不能移作他用省城駐紮鴻字三營尙須分防蒲圻
茶山大冶鐵山江夏煤廠及武穴等處漢口巨鎮綿亘
十餘里華商洋行之所萃僅駐有升字兩營卽專爲彈
壓洋街已有不給不得已飛調麻城緝私鼎字副營來
省填紮防護以顧根本麻城僅駐鼎字一營北私隨卽

充斥旋又於六月內以河南商城固始等縣訛傳匪警
麻城羅田黃岡黃陂孝感一帶居民登時驚擾紛紛遷
徙急切無營可調乃於襄河汛段內暫行抽撥礮船數
號馳往鎮撫查拏匪棍訛言始息而沿江商賈五月內
以教堂多事六月內以豫警謠傳裹足不前釐金收數
因之大絀計五六兩月已短收錢三萬餘串自五月以
來外府州縣凡有教堂教民之處無不乘機思逞小有
紛紜經各地方文武竭力彈壓保護乃近日宜昌又有
焚毀教堂之案情形尤重假如再有一處生事直無可
以派往防護查辦之勇事體何堪設想此武漢勇營不

敷調撥顧此失彼之實在情形也襄陽毗連秦豫僅有馬隊二營共只三百餘名亦爲巡緝潞私所占荊州宜昌鄖陽施南等府界連湖南川陝馬步一營俱無從前川楚教匪卽由湖北與川陝交界地方起事近年興山房縣一帶拏獲會匪首犯劉良棟舒春山等河南鄧州弋獲棗陽連世傑等均經奏明有案其安陸府屬之天門潛江京山漢陽府屬之沔陽襄陽府屬之襄陽光化均州等州縣及荊門州凡沿襄河一帶皆有會匪頭目黨夥皆盈千累百往往藉廟會拜神爲名訂期聚會私開爐座製造軍器兵役往拏公然抗拒現已經飭司委

員密往查獲巢穴多處若無水陸營勇協力兜擒必致釀成巨患尤可慮者湘省會匪所叢根株眾盛幾於無縣無之洞庭湖淤出之南州尤爲逋逃淵藪卽與湖北石首公安等縣毗連上年澧州匪首楊思沅廖星階等滋事重煩兵力業經湖南撫臣張煦奏明在案今年春間復經兩省先後拏獲同夥在荊州岳州放飄之會匪渠魁李典葉坤山現在澱浦縣復有會匪聚眾劫獄焚搶衙署之案澧州復有糾眾燒燬電桿之案湘省各屬盜匪近日尤爲繁多總由年來宿將彫謝會黨日多乘隙生心亂徵已見湘鄂接壤若匪黨蠢動四處響應調

撥則無兵可分招募則咄嗟莫辦上游有警各路震驚
馴至燎原勢成圖之已晚且湖南匿名揭帖種類極多
雖經疊次查拏嚴禁至今未息岳常澧一帶近日尤盛
因之傳播鄂省舊帖方燬新帖旋出方今交涉事體最
關緊要何堪再有枝節以致上貽宸廑臣等督同司道
等籌商僉以目前事勢武漢地方總須添募三四營極
少亦必須添募步隊兩營方可備有事調撥之用臣等
極知庫儲支絀部臣方建裁減勇營一成之議何敢不
遵照籌辦反爲添募之舉惟體察現在時勢鄂省勇營
實係裁減過多備禦空虛會匪日滋交涉緊要情形定

豈可危實不敢忘遠慮而貽近憂惜小費而釀大患設遷就貽誤臣等罪戾滋深特兩營餉項殊不易籌復令地方官與紳商再四籌商均以此事專爲綏靖地方暫添兩營斷不可少其一營之餉擬由商民籌捐不動庫款其一營之餉容臣等督飭司道於司局各款內極力騰挪勻撥總以無誤每年京協各餉爲斷俟一二年後如果匪戢民安再行裁撤卽以籌餉而論兵力壯盛民心安帖商賈暢行稅釐鹽課等款亦必暢旺鄂省餉章每年一營不過二萬一千餘兩所保全之數必遠逾於所費之數籌之已熟故敢披瀝上陳如蒙俞允此所添

兩營共一千人擬照他省辦法就此勇數分爲四底營
每營二百五十人調撥較便聲勢較壯合併陳明
硃批著照所請該部知道欽此

武穴教案償補各款請援照鎮江關賠款成案撥
解摺

光緒十七年九月三十日

竊查武穴地方焚燬教堂毆斃洋人一案業經辦理完
結其英國人武穴洋關分卡扞手柯姓暨教士金姓無
辜殞命情殊可憫自應酌予撫恤教堂並失物亦應修
復補還遵照總理各國事務衙門來電從優議給當經
飭令江漢關道與稅務司向漢口英領事商明應允議

給該兩洋人家屬撫恤各洋銀二萬元修復教堂補還失物洋銀二萬五千元該領事現已稟明公使專候復文到日即可收款完案業經恭摺具奏在案惟查前項洋銀共六萬五千元計漢平足色銀四萬五千三百七十兩折合庫平足色銀四萬三千三百五十兩現在司關兩庫實無閒款可籌擬請援照鎮江關上年賠款成案在於江漢關所徵六成洋稅項下照數撥解等情由署湖北布政使陳寶箴江漢關道孔慶輔會詳請奏前來臣覆核無異謹恭摺具陳伏乞聖鑒

硃批該衙門知道欽此

查明澧州毀拆電桿情形摺

光緒十七年十月二十八日

竊臣等承准軍機大臣字寄光緒十七年七月十五日奉
上諭有人奏官民構釁亟應思患預防一摺據稱湖南
澧州委員下鄉豎立電桿勒索騷擾以致州民毀拆
電桿毆打委員地方官勒交滋事匪徒該州團練匿不
交出並有聚眾與官爲難等語現在各省會匪甚多必
須嚴行拏辦所奏該省毀拆電桿是否委員實有需索
激變情事抑係奸民藉端煽惑著張之洞張煦確切查
明妥速辦結毋任養癰貽患原摺均著抄給閱看將此
各諭令知之欽此查此案先經臣等札飭湖南岳常澧

道廷杰督同署澧州知州裕慶並由臣之洞委湖北候補知府李謙馳往確查據實稟覆妥辦欽奉寄諭後復經札飭查覆茲據該道等先後稟覆稱前湘省奉辦電綫當將電綫之設有利無害工作概用華人不用洋匠以及無礙民間田墓廬舍各緣由疊次曉諭民間俱已曉然並無異說以爲可以相安迨委員到境接辦詎料州屬之馬家河青泥潭等處地方愚民終疑電綫關涉洋務必係洋人所設適逢本年各省匪徒布散謠言揭帖專意與洋人爲難又聽信地痞訛言如設電綫以後幼孩牲畜損壞綫桿者皆須處死民間受累無窮於是

疑團愈結電綫達湘澧州係入境首站適該州界溪橋地方因教士趙本篤造屋民人盜賣地基之案州民公稟有禁阻洋人之議而總辦電報局山東東海關道盛宣懷委辦之員又已赴常德料理電桿事宜留在澧州之司事工頭穿戴多係窄衣席帽鄉人視此異服益疑爲洋匠工作確係洋人所設紛紛傳播各團民愈聚愈多其勢洶洶所執旗幟大書痛逐洋人禁止洋綫字樣竟將馬家河青泥潭孟溪寺各處綫桿鉤碗等物先後焚毀多件澧州派有彈壓照料之委員紳士因救護物料紳士王坦齋致被火把熏灼並未受傷被毆復恐官

派兵拏辦團眾聚集不肯散歸當經地方文武防營彈壓開導並飭城鄉紳士明白曉諭旋即解散先後拏獲滋事拒捕首要各痞匪十三名到案訊供另行擬辦並據查明委員下鄉辦理實無勒索騷擾情事所有毀失綫桿等物尙不甚多該紳民情願賠還惟愚民始終堅執爲洋人安設謂電綫設後必引洋人入湘猝難開導懇請緩辦各等情此該道等查明澧州團民阻毀電綫之實在情形也臣等查湘省創設電綫原爲通遞緊要官報而設方今除湖南一省外其餘十九省徧行設有電綫上年疊據湖南藩臬兩司暨沿途經過之岳常澧

道長寶道澧州武陵龍陽益陽沅江甯鄉長沙善化湘潭等州縣稟復業經曉諭民間俱無異言始行奏准開辦此次先據該印委稟報澧州鄉民阻毀電桿指爲洋人所設一時猝難開導又因夏令雨多水漲電桿應行經過地方濱臨湖汊多被水淹本難工作經臣之洞飭令暫行停工一面妥爲彈壓訪拏鬪鬧之犯訊辦在案茲該道州委員等先後查覆前來臣等覆加察核此次安設電綫經先示諭開導當時並無異詞出示至開辦已逾半年省內省外紳民並無一人呈請停設之事乃適逢本年春夏間澧州公阻教士兼之各省毀鬧教堂

澧州傳布揭帖甚多愚民竟疑電綫爲洋人所設遂將電綫與洋人傳教糾結成爲一事竟至形諸旗幟復經地方痞匪造言煽惑謂電綫設後民間受累無窮於是眾情惶惑牢不可破雖疊經印委剴諭紳士俱能曉然愚民竟難理喻此次團民聚集焚毀電桿旋即解散並未毆打委員在愚民誤認爲洋人所設輕信地痞謠惑畏累疑懼情尙可原而聚眾鬧毀棄官物刁風亦不可長現已將鼓眾滋事痞匪拏獲多名酌予懲辦示儆所有毀失綫桿等物尙不甚多已據自認賠還電綫本因水大停工已飭暫緩安設俟以後從容開導能否一

律曉悟再爲妥酌辦理現在地方均已安靜至委員承
辦此事深知湘省民情强悍此等創舉但期加意聯絡
妥洽集事豈能再向民間需索騷擾現據查無勒索騷
擾情事白屬可信仍飭地方文武嚴密查緝以後如有
會匪地痞任意造謠藉端生事卽隨時嚴拏重辦斷不
令養癰貽患以靖地方
硃批知道了欽此

爲陶定昇請卹摺

光緒十七年十一月初三日

竊照頭品頂戴已故記名提督廣東瓊州鎮總兵陶定
昇爲湘省知名宿將光緒九年前兵部尙書彭玉麟辦

理廣東防務奏調該故提督由江南移軍赴粵駐防海口礮臺設險整軍備著勞勩嗣由臣奏委署理陽江北海兩鎮篆務治軍有方北海鎮新設未久該故提督於建置各事宜規畫悉當臣在粵曾經疊次保薦將才光緒十五年該故提督以積勞觸發傷疾請假回籍就醫十六年十一月初二日奉旨補授廣東瓊州鎮總兵而該故提督已先於是年八月十四日據報在籍病故矣查該故提督陶定昇籍隸湖南巴陵縣咸豐六年投効老湘營爲統將已故道員王鑫所識拔其後隸前廣東陸路提督劉松山部下倚之如左右手每戰必與之偕

管帶老湘第一旗轉戰江西安徽山東河南直隸陝西
甘肅等省克復安徽休甯黟縣建德徽州府陝西綏德
州甘肅靈州等城邊平甘肅吳忠堡金積堡堅巢厯保
花翎遊擊洊升提督賞正一品封典由冠勇巴圖魯賞
換博奇巴圖魯名號賞穿黃馬褂賞給頭品頂戴該故
提督勇敢篤實謀定後戰橫厲無前善度地勢知進退
臨機應變雖倉猝眾寡不敵未嘗退卻其勦髮逆也屢
破大股悍賊於江西臨江吉安吉水等處咸豐十年攻
打吉水禾峒賊勢蠡擁該故提督當先陷陣礮傷左股
不少卻旋於安徽休甯迪祥湖陣斬衝鋒悍賊蹙偽忠

王李秀成於黟縣攻克其城再解徽州之圍十一年二月攻破上溪口踏毀何村石田小當一帶賊壘乘勝克復休甯縣城十二月僞輔王楊輔清圍攻徽州城該故提督迭次拔關出戰被賊斷其右小指猶忍痛前進斃賊多名圍久不解該故提督於黑夜縋城焚賊多壘賊始冒雪遁去同治元年秋間髮酋黃文金楊輔清圍攻甯國涇縣該故提督堅守以待援至內外合擊悍賊次第殲除其勦捻回各匪也同治五年四月捻逆張總愚牛落紅一股圍攻山東曹縣該故提督率老湘第一旗充當先鋒力戰敗之又屢敗竄賊於江蘇豐沛徐州睢

甯等處七月賊分竄河南上蔡該故提督追至雙廟冒
雨設伏邀擊逼賊鳧水渡河淹斃過半六年四月追剿
陝西同州朝邑捻匪大股七月自渭南新莊永樂鎮等
處節次攻剿至興平呂家莊一帶俘斬無算十一月捻
同合股十餘萬踞綏德州該州下游阻山臨水賊營踞
其上游以百計我軍僅十八營殊以爲慮該故提督夜
領軍伏蘆葦中枵腹一晝夜出奇誘賊突起遮擊賊潰
返黑夜窮追六十里立復州城七年正月賊擾直隸近
至保定該故提督星夜馳擊彌月不收隊賊南竄跟追
至滹沱河殺斃淹斃賊眾甚多冬間由山西汾州追賊

入陝搗毀懷遠縣大小理川各賊巢麀戰六晝夜餐宿
俱廢八年八月陝回賊目余彥祿馬正和敗竄靈州郭
家橋該故提督由中路進剿踏毀賊巢二十一處又敗
甘回馬愛王洪於郭家橋馬正和等股竄走吳忠堡南
岸白黑城子半箇城至金積堡數十里火光燭天陝回
馬生彥等大舉撲營該故提督由左路衝殺擊退賊眾
右膀中槍子深入骨銳不少挫九月攻賊於靈州賊開
南門死拒該故提督從中路猛攻賊退縮入城卽策馬
乘勝搶入州城遂復嗣是吳忠堡一帶踞賊節次剿洗
殆盡十二月十三日賊眾麀聚胡家堡官軍左右夾擊

黠賊四出乘之賴該故提督相機策應斃賊七百有奇
陝回附堡壕內外支帳抗拒十九夜官軍焚其帳正酣
鬪間忽援賊抄至該故提督突起奮擊故未爲賊所乘
九年正月合攻金積堡旁馬五賊寨劉松山爲飛子洞
中左乳該故提督憤甚引軍孫附賊寨縱火焚燒生擒
馬五雪憤二月堡賊掘堤撲營勢極兇悍該故提督梟
水橫出賊前奮力衝擊斬馘甚多三月擒斬賊目馬二
虎陳金子四月該故提督設伏於山後三關誘賊奪糧
突起殺斃二百餘名生擒二十一名手刃賊目馬順之
七月賊就馬連渠據壘死抗該故提督於五鼓伏隊高

梁叢中伺賊放牲畜乘隙奪門入賊從睡夢中驚起錯愕狂奔裸屍枕藉立平其壘八月秦壩關敗賊回撲悍甚該故提督挺矛殿後賊不敢近全軍而退旋攻堡東卡壘賊木石齊下該故提督從礮眼猱升而上雖血流被面不顧卒破之九月進攻堡西賊壘賊縋人出壘助戰該故提督奮勇衝鋒殺斃悍賊血襦衣袖盡毀賊壘長圍始合金積堡老巢自此盪平蒙賞上方珍物同治十年經故大學士曾國藩調赴江西管帶老湘營督修沿江礮臺疏濬新河口便民河西壩鹽河各河道歷經前兩江督臣沈葆楨左宗棠以堪勝總兵及堪勝海防

任使疏薦左宗棠稱其驍勇素著營官最爲出色又稱
爲湘軍營官最爲出力之員委令統領老湘合字等營
迨奉調赴粵修築南石頭及虎門大角礮臺督塞海心
岡海口督軍扼守枕戈終年海防賴以完固復令履勘
瓊廉各海口礮臺礮堤基址綢繆相度不辭勞瘁查該
故提督自從軍以來戰必衝鋒奮不顧身疊次受傷甚
多大角爲虎門以外之山斗入大海爲海風及行營潮
濕所侵觸發舊傷在廣東大病幾危請假回籍醫療不
痊在籍病故年甫五十五歲時事多艱將才難得如陶
定昇者早奮戎行屢摧強寇怕應專閩之寄已爲身後

之榮年力正強中道彫謝臣竊傷之茲據其舊部記名
提督劉立志舒永勝謝玉泰陶國安補用副將易文元
陳萬興陶鼎友等臚陳該故提督戰功事蹟具稟前來
合無仰懇天恩俯准將已故記名提督廣東瓊州鎮總
兵陶定昇照軍營立功後積勞病故例從優賜卹生平
戰功事蹟宣付史館立傳並附祀於安徽陝西甘肅等
省會國藩左宗棠劉松山專祠以彰盡績
硃批另有旨欽此

熊鐵生調鄂差委片

光緒十七年十一月初三日

再臣於上年春間附片奏請將記名提督陶定昇熊鐵

生二員調赴湖北差委奉硃批該省現無軍務毋庸調往欽此欽遵在案伏查湖北爲南北水陸要衝茲當教案會匪巡防喫重之際業經臣奏請添募勇丁兩營共一千人奉旨允准在案查此項新增營勇非得知兵宿將不足以任統率而資控馭查湖北省差委之記名提鎮本屬無多其材器威望卓然出色者尤爲罕覯統將之選實難其人再四思維查記名提督熊鐵生謀勇兼優威望素著上年六月丁憂在湖南原籍現已在一年之外惟有籲懇天恩俯念鄂省地方緊要統將需人准將該提督調赴湖北差委實於地方營務大有裨益

張文襄公全集 卷三十一
硃批著照所請該部知道欽此

張文襄公全集卷三十終

紹興孫家棟校